

**Usah Jadikan Demonstrasi Jalanan Sebagai Budaya: Najib**  
**mStar Online**  
**Julai 11, 2011**  
**Oleh SUSAN ALBERT KASSIM**

**KUALA LUMPUR:** Perdana Menteri Datuk Seri Najib Tun Razak menasihatkan rakyat supaya tidak menjadikan demonstrasi jalan sebagai budaya di negara ini.

"Kita tidak suka keadaan huru-hara. Kita suka keamanan dan mahu hidup dalam suasana aman dan harmoni...bukan tunjuk kekerasan kepada mana-mana pihak," katanya mengenai perhimpunan Bersih ketika berucap pada Majlis Penerangan Perdana di Dewan Merdeka, Pusat Dagangan Dunia Putra (PWTC), pagi Ahad.

Menurut Najib, Umno tetap menghormati undang-undang negara dan mengamalkan sistem demokrasi di bawah pentadbiran raja berpelembagaan sejak negara mencapai kemerdekaan.

"Kita akan terus mempertahankan sistem demokrasi dan tidak takut menghadapi pembangkang pada pilihan raya umum apabila tiba masanya nanti," ujarnya.

Beliau berkata, Umno boleh menggumpul ahli yang lebih besar berbanding penyokong pembangkang yang membuat demonstrasi tetapi enggan bertindak sedemikian kerana menghormati undang-undang negara.

"Kekuatan kita jelas, jangan ada sesiapa yang sangsi dengan kekuatan yang kita ada. Mereka sasar kumpul 300,000 penyokong, tapi yang datang hanya 10,000 orang.

"Tapi Umno ada tiga juta ahli...kita kumpul satu juta pun dah cukup. Kita dah tawan Kuala Lumpur dengan satu juta ahli Umno, kita boleh lawan, semalam kita hanya bagi wakil kita Ketua Pemuda saja turun.

"Dia sanggup...merasa duduk lokap lapan jam. Itu baru sikit. Kita boleh turunkan angkatan kita. Kalau nak buat porak-peranda kita boleh tapi kita berhimpun di dewan ini kerana menjunjung prinsip undang-undang negara," katanya.

Bagaimanapun, Najib menyatakan rasa kesal terhadap Gabungan Pilihan Raya Bersih dan Adil kerana tidak menghormati titah Yang di-Pertuan Agong dan Raja Melayu.

"Pada awalnya mereka bersetuju untuk tidak mengadakan perarakan di jalan tapi mereka tetap buat perarakan aman yang tak jadi aman.

"Nak tunjuk kepada dunia kononnya kerajaan tak demokrasi dan tidak menghormati undang-undang hak asasi manusia serta negara kita tidak liberal. Sebenarnya sistem demokrasi di Malaysia sangat baik dan adil," katanya.

Sehubungan itu, Najib memberitahu kerajaan khususnya Umno akan bangkit selepas tragedi huru-hara yang dicituskan pembangkang di ibu negara pada Sabtu.

Beliau berkata, Umno tidak gentar untuk melaksanakan pilihan raya bersih dan adil bahkan mereka akan melakukan penambahbaikan bagi memantapkan jentera Barisan Nasional (BN).

"Kita akan berpadu dengan bangsa lain untuk menang pada Pilihan Raya Umum Ke-13 nanti. Apabila dah bersatu-padu kita minta Yang di-Pertuan Agong untuk bubar Parlimen. Kita nak dunia menghormati Umno," kata Najib di akhir ucapannya.

Hakcipta Terpelihara © 1995-2011 Star Publications (Malaysia) Bhd (Co No 10894-D).

Source:

[http://mstar.com.my/berita/cerita.asp?file=/2011/7/11/mstar\\_berita/20110710140947&sec=mstar\\_berita](http://mstar.com.my/berita/cerita.asp?file=/2011/7/11/mstar_berita/20110710140947&sec=mstar_berita)